

Neva competenzes e intendimenc per l Comun General de Fascia

La pruma sentèda l'é stat l'ocajon per dèr fora la encèries ai ombolc e palesèr obietives e projec

Politica - En ocajion de la pruma sentèda ofiziala del Comun General de Fascia la Procuradora Cristina Donei, apede a nominèr i referenc de chesta neva istituzion, à anunzià enche la competenzes che aldò del statut per i prumes 5 egn les ge vegn dates sù dutes ai ombolc.

Donei, apede a l'encèria de Procuradora, arà enche chela sui afares generèi e istituzionèi (statut del Comun General), la se cruziarà di rapore coi etres enc e istituzions provinzièles e interladines, de la

oportunitèdes pervalives, de la Consulta culturala ladina e politiches linguistiches e del personal de Comun General.

Al vize Procurador e ombolt de Cianacei Mariano Cloch ge é stat dat la competenzes sui lurieres publics (pista per la rodes) e l patrimonio immobiliare.

L'ombolt de Mazin Fausto Castelnovo se cruziarà de economia e comerz, programazion sozio-economica, comerz, arzejanat, agricoltura, protezion

zivila, sport e comitat tecnich de la Provinzia.

Tullio Dellagiacom, ombolt de Poza, arà la competenzes su l'ativitèdes sozio-economiche e sanitarie, l'editoria e informazion su l'atività del Comun General de Fascia.

A l'ombolt de Moena Riccardo Franceschetti ge é stat dat la encèries sul turism, viabilità, trasport e mobilità (skibus, impiant portamont), ecologia e ambient, gestion di refudames (tant per chel

che vèrda i plans e i projec del setor, che per chel che vèrda la strutures soracomunèles desche i CRZ e l'impiant de compatazion de Ciarlonch).

Franco Lorenz, ombolt de Vich, cognarà se cruzièr de pianificazion urbanistica, edilizia publica e de abitajon e i zentres storiches.

A l'ombolt de Soraga Roberto Pellegrini ge é stat assegnà la competenzes sul bilanz, la gestion di servijes soracomunèi e prozedures per la unificazion-

omogeneizazion di regolamenc, de la tassess e steores.

L'ombolt de Ciampedel Renzo Valentini se cruziarà de istruzion e scola, cultura e politiches linguistiches e de la Consulta culturala ladina.

La encèries cognarà vegnir ofizialisèdes trè n decret del president de la Provinzia Lorenzo Dellai che ge darà sù la neva competenzes ai comembres del Consei di Ombolc del Comun General de Fascia.

Solidarietà, libertà de gestion e identità

Te sie prum intervent portà dant a la radunanza, la Procuradora Cristina Donei à palesà i prumes entendimenc per la neva istituzion.

"Solidarietà, libertà de gestion e identità: chisc trei concèz - à dit Donei - che i é te nosc DNA, i ne é stac tramane da nesc aves i à segnà la veia Comunità de Fascia te sie percors de ent democratich e bona pèrt de la storia fascèna. L carater coetif, la condivizion de la ressors, l'interdipendenza, l poder se lascèr sul vejin, i à fat crescer e svilupper na sozietà comunitaria che tegnia adum jà da l'Età del Fer, co la cèses tachèdes una su per l'altra a meter al luster l raport anter i feghes e la spartijon del teritorie aldò del prinzip de la valivanza e de la solidarietà, che ge daje a duc la giusta pèrt per sostegnir la familia e ge arseguirèr coscità a la sozietà da zacan l ben comun (jir sa mont, spartir l bait). N leam col teritorie, donca, n

teritorie sfadios da lurèr e pured de fruc, ma che ampò ge à dat l met a la jent de binèr adum la forzes te la logica de la soravivenza e de la colaborazion che à portà a svilupper e lurèr fora strategies, libertà de autogovern, de gestion del teritorie, de la ressors, zenza cognèr depener da la gerarchie de chi tempes, ma demò diretamente dal piscop de Persenon.

I fascegn aea abù chest privileg ajache i aea sapù desmostrèr capazità de se rejer enstesc sia valèda, lealtà e coerenza ti confron del prinzip piscop, olache duc era responsaboi de la gestion de la val aldò del prinzip che l'amministrazion l'era n derit doer de duc e olache la democrazia e la rapresentatività l'era i elemenc a fondament de la

istituzion de la Comunità de Fascia.

A chesta vida l'ent l'é ruà apede a la jent, l'é doventà democratich, partezipatif e del dut responsabòl de la dezijsions che l tolea.

Chisc l'é i prinzipies che tolon fora da la storia de la Comunità de Fascia e che, encheben che sie passà n muie de temp, podon fèr nesc, e gè me augure che i posse ispirèr ches nef ent acioche l doventèr la sciantiva esprescion de la val te la gestion del ben comun.

Chisc prinzipies no pel auter che vegnir renforzè da n spirit gaert de identità, olache lengaz, cultura, tradizion fèsc da leam e de chela che noscia comunanza pel jir stolza. Na identità sentuda dalbon, no demò outa al passà, ma moderna, ativa te la condivizion e compartezipazion di valores

tipiches.

Chel che sion dò che fajon l'é n vèrech storich per noscia Val. Jon a meter endò sù na istituzion che à abù sià pèrt te la storia de Fascia e cognon meter a fondament del Comun General sie valor fondamentèl, l ben comun. Cognon aer a cher l davegnir de chesta Comunità che l'ha da passèr fora duta la endesfides che l davegnir ge resserva con n vero autogovern, con n'autonomia forte e vera che la Provinzia de Trent, dò noscia proponeta, à sapù perveder per chesta valèda. No sarà demò n prozess de razionalizazion de la Publica Amministrazion, n restiling per ge dèr maor fazion, ma na vera e propria reforma politica. Se trata de ge dèr al Comun General l poder de cerner e de dezider del svilup

sozièl, economic e culturèl de noscia comunità. No se trata demò de endrezèr i servijes a una, ma de pianifichèr e cerner en autonomia per l davegnir de la comunità fascèna.

La competenzes passèdes da la provinzia de Trent e cheles che i Comuns ge lasciarà al Comun General ge darà a la val l met de meter adum, a livel istituzionèl, n unicum no demò te la storia de Fascia e del Trentin ma enche tel panoram giuridich/istituzionèl talian e european: n model de defendura e de promozion de na mendaranza che utrò no l'é de compagne.

Ades che l statut ne sporc gran possibilità de autogovern, no podon mènccer de desfrutèr miec che l'é meso chesta ocajion storica."

È tel cher n Consei che l sie gremen de idee

L President del Consei Cesare Bernard met dant si projec e intendimenc per l Comun General de Fascia

"La Procuradora e i 30 Conseieres me a lità per esser President del Consei General de Fascia. Cogne dir che me à fat piajer chesta stima, che spere no la sie massa auta. Tel medemo temp sente enche la responsabilità de n lurier, che l'é nef e grief per duc.

Se l Consei m'à cernù per chesta enciaria l'é perché i comembres spartesc co me la volontà de se dar jù, l'amor per noscia tera. Per chest no m'é tira endò. Apede me é Francesca Dorich e Cristian Lorenz, desche vizepresidenc, che se a metù a la leta con spirit ùmol e estro de far; l'é n Consei che met ensema jent con esperienza amministrativa e joegn co la gaissa de pissar e far l ben de Fascia.

Cognon vardar al davegnir. Le reisc l'é bone. Con chest peisse a la veiora comunità de Fascia, fontana e fondament de noscia comunanza, con si valores de democrazia, de partezipazion e del Ben Comun. Aon soraldut na bona pianta. E chiò fae referiment prezis al moviment ladin che soraldut i ùltime 60 egn à arjont obietives e possibilità che na uta nesciugn aessa pissà e anché ne fasc luster.

Ma ades l'é da se cruziar di fruc. L Comun General cogn far

doventar dute cheste norme e legi n met percheche le familie, i joegn, la jent de età, dute nosce attività le podesse viver e jir inant miec.

La jent de Fascia se speta de gran robe dal Comun General. L Consei General podarà dar so fest didament se nesciugn se tira endò e ogne un dasc dut chel che l'é bon de far.

Voi esser al temon de n grop de persone che à volù doventar Conseier del CGF, per far e no per desfar, per pissar ensema e no contra zeche o zachei, per portar inant l spirit de partegnuda e no per despartir e destrabonir.

È tel ciaf n Consei che scouta le rejon de vigni un, ma l peissa, l varda, l fasc per l Ben de duc.

Sarà l post olà meter ensema, binar a una, cerir soluzion per l Ben Comun, de duc; valorisar l saer e le idee de le persone, uzar fora e defener dut chel che fasc desvaliva e soula noscia Val: l lengaz e la cultura, la jent e l'estro de se didar un co l'auter, i monc e nosc teritorie, i valores fogn e drec de la tradizion fasciana.

È tel cher n Consei che l sie gremen de idee neve, da fondament, ùtole e possibile.

A la jent de Fascia ge domane de cognoscer i Conseieres del



La Procuradora con sie vize Cloch e l president del Consei Bernard coi vize Dorich e Lorenz.

Consei General, e de jir a i scinternar, no per reclamar o dir jù, ma per dar proponete e meter dant i besegnes de duta noscia val.

A duc ge domane, e gio per prum metaré, chel mescedament de gaissa e de pazienza che ge vel per arjonjer le cime più aute. A

duc ge domane de didar dò chisc prumes varec che i pea via sempre più inant. Una l'é Fascia e un l'é so davegnir."